

UDHËZIM
Nr. 1, datë 20.2.2015

PËR MBLEDHJEN, ADMINISTRIMIN DHE PUBLIKIMIN E REZULTATIT
PARAPRAK TË ZGJEDHJEVE

Komisioni Qendror i Zgjedhjeve, në mbështetje të nenit 21, pika 1, nenit 23, pika 1, germa “b”, nenit 119, pika 2 dhe nenit 122, pika 3, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar,

UDHËZON:

Neni 1
Qëllimi

Ky udhëzim ka për qëllim të përcaktojë procedurat që do të zbatojnë KZAZ-ja dhe KQZ-ja për mbledhjen, administrimin dhe publikimin e rezultatit paraparak të zgjedhjeve.

Neni 2
Informacioni që do të japë elektronikisht KZAZ-ja

1. Pas marrjes në dorëzim të materialit zgjedhor, KZAZ-ja duhet të dërgojë elektronikisht në KQZ informacionin për:

- a) Qendrat e votimit në të cilat zgjedhjet nuk janë zhvilluar, nëse ka;
- b) Kutitë e votimit dhe kutitë e materialeve zgjedhore të cilat janë vlerësuar si “Kuti të parregullta”.

2. Pas plotësimit të tabelës së rezultateve të çdo QV-je, KZAZ-ja të dërgojë elektronikisht në KQZ informacionin për rezultatin e zgjedhjeve të çdo QV-je për partitë politike dhe kandidatët në mënyrën e përcaktuar në këtë udhëzim.

Neni 3
Përmbajtja e informacionit për rezultatet e zgjedhjeve

1. Informacioni për rezultatin paraparak dërgohet sipas të dhënave në tabelat e rezultateve të plotësuara nga grupet e numërimit dhe të dorëzuara në KZAZ.

2. Informacioni duhet të përmbajë domos-doshmërisht për çdo QV:

- a) Numrin e zgjedhësve që kanë votuar;
- b) Numrin e fletëve të votimit të papërdorura;
- c) Numrin e fletëve të votimit të dëmtuara;
- d) Numrin e fletëve të votimit të gjetura në kuti;
- e) Numrin e votave të pavlefshme;
- f) Numrin e votave të vlefshme;
- g) Numrin e fletëve të votimit të hedhura gabim;
- h) Shpërndarjen e votave të vlefshme sipas rastit, për partitë politike dhe kandidatët e propozuar nga zgjedhësit ose për kandidatët për kryetar bashkie.

Neni 4
Kushtet që duhet të plotësojë aplikimi kompjuterik për hedhjen, transmetimin dhe publikimin e rezultatit paraparak të zgjedhjeve

1. Aplikimi kompjuterik për hedhjen, transmetimin dhe publikimin e rezultatit paraprake duhet të njoftojë kur shkelen këto rregulla:

a) numri i zgjedhësve që kanë votuar duhet të jetë jo më i madh se numri i zgjedhësve në listën e zgjedhësve;

b) numri i fletëve të votimit të gjetura në kuti duhet të jetë i barabartë me numrin e zgjedhësve që kanë votuar;

c) numri i fletëve të votimit të gjetura në kuti duhet të jetë i barabartë me shumën e votave të pavlefshme me votat e vlefshme;

d) numri i votave të vlefshme duhet të jetë i barabartë me shumën e votave të vlefshme të shpërndara sipas rastit, për partitë politike dhe kandidatët e propozuar nga zgjedhësit ose për kandidatët për kryetar bashkie.

2. Në rast se cenohen kushtet e përmendura në pika 1 “a” dhe 1 “b” të këtij neni dhe pas verifikimeve që bën sekretari i KZAZ-së rezulton se mospërputhja vjen nga ndonjë gabim njerëzor i bërë në VNV, lejohet korrigjimi në sistem i shifrave;

3. Në rast se cenohen kushtet e përmendura në pika 1 “a” dhe 1 “b” të këtij neni dhe pas verifikimeve që bën KZAZ-ja rezulton se mospërputhja nuk vjen si pasojë e gabimeve njerëzore, por pasqyron të dhënat që janë në procesverbalin e mbylljes së votimit, aplikimi kompjuterik lejon vazhdimin e procesit duke bërë në sistem shënimin “mospërputhje”.

4. Aplikimi kompjuterik nuk duhet të lejojë për asnjë arsye cenimet e rregullave të përmendura në pikat 1 “c” dhe 1 “d” të këtij neni.

Neni 5

Përgjegjësia për përcjelljen e informacionit në KQZ

Hedhja e informacionit në aplikimin kompjuterik si dhe përcjellja e informacionit të përcaktuar në këtë udhëzim, në KQZ, bëhet nën drejtimin dhe përgjegjësinë e sekretarit të KZAZ-së.

Neni 6

Mënyra e dhënies së informacionit për rezultatet nga KZAZ-ja në KQZ

1. KZAZ dërgon në rrugë elektronike në KQZ, për çdo QV, informacionin e përcaktuar në pikën “a” dhe “b” të nenit 2 të këtij udhëzimi, menjëherë pas marrjes në dorëzim nga KZAZ-ja të kutive të fletëve të votimit dhe kutive me materialet e votimit nga të gjitha KQV-të.

2. KZAZ dërgon në rrugë elektronike në KQZ, për çdo QV, informacionin e përcaktuar në pikën “c” të nenit 2 të këtij udhëzimi, menjëherë pas marrjes së tabelës së rezultateve nga GN-ja. Ky proces vazhdon deri në përfundimin e vlerësimit të numërimit të votave dhe dorëzimit të të gjitha tabelave të rezultateve prej GN-ve sipas kësaj mënyre:

a) Sekretari i KZAZ-së, pasi GN-ja i dorëzon tabelën e rezultateve të një QV-je, ia jep atë operatorit të hedhjes së të dhënave. Operatori i hedh të dhënat e tabelës së rezultateve në aplikimin elektronik në kompjuter dhe printon në letër informacionin që ka në formë elektronike. Në momentin e printimit aplikimi elektronik automatikisht bëhet i paeditueshëm/i pashkrueshëm.

b) Tabela e printuar nga forma elektronike i dorëzohet GN-së nga sekretari i KZAZ-së, për të verifikuar vërtetësinë e të dhënave.

b.1) Në rast se informacioni në tabelën e rezultateve të plotësuar me shkrim dore dhe ai i printuar nga sistemi elektronik janë të njëjta, sekretari i KZAZ-së, duke futur në sistem kodin personal të tij, udhëzon operatorin të dërgojë në rrugë elektronike rezultatet në KQZ

b.2) Në rast se informacioni në tabelën e rezultateve të plotësuar me shkrim dore dhe ai i printuar nga sistemi elektronik janë të ndryshme, numëruesi i parë i GN-së bën korrigjimet me shkrim dore në fletën

e printuar dhe kjo fletë firmoset nga anëtarët e GN-së. Sekretari i KZAZ duke futur në sistem kodin e tij, kthen aplikimin elektronik në të editueshëm/të shkrueshëm, udhëzon operatorin të bëjë korrigjimin e të dhënave të pasakta dhe përsëritet procedura e printimit, verifikimit dhe më pas dërgimit në KQZ.

3. Pas transmetimit të të dhënave të rezultateve të QV-së në KQZ, sekretari i KZAZ-së udhëzon operatorin të skanojë tabelën e rezultateve të plotësuar e firmosur nga GN-ja dhe ta transmetojë atë në KQZ.

4. Formati i printuar dhe tabela origjinale e rezultateve plotësuar nga GN-ja i bashkëngjiten njëra-tjetrës dhe shërbejnë si dokumentacion zyrtar që i dorëzohet KQZ-së.

5. Pas përfundimit të procesit të numërimit të votave të të gjitha QV-ve dhe miratimit nga KZAZ-ja i tabelës përmbledhëse të rezultateve për ZAZ-në përkatëse, sekretari i KZAZ-së udhëzon operatorin të skanojë dhe dërgojë në rrugë elektronike në KQZ, vendimin e KZAZ-së për miratimin e tabelës përmbledhëse të rezultateve së bashku me tabelën përmbledhëse të firmosur nga anëtarët e KZAZ-së.

Neni 7

Publikimi i informacionit lidhur me procesin e numërimit të votave

Me marrjen e informacionit nga KZAZ-të, KQZ bën publikimin në dinamikë të rezultatit paraprak në rang zone zgjedhore.

Publikimi i informacionit të mësipërm bëhet në monitorët e sallës së mediave, në faqen e KQZ-së në internet dhe printohet në letër.

Rezultatet paraprake të jepen në numër votash të vlefshme, përqindje dhe mandatet përkatëse të fituara sipas rastit, për koalicionet, partitë politike e kandidatët e propozuar nga zgjedhësit dhe kandidatët për kryetar bashkie.

Neni 8

Rezultati paraprak i publikuar nga KQZ-ja, në çdo rast, shoqërohet me numrin gjithsej të QV-ve në zonën përkatëse zgjedhore, me numrin e QV-ve mbi të cilin është llogaritur rezultati i dhënë dhe me shënimin që ky rezultat është paraprak.

Neni 9

Udhëzimi i KQZ-së nr. 17, datë 22.5.2009 “Për mbledhjen, administrimin dhe publikimin e informacionit për procesin e numërimit të votave për Zgjedhjet e Kuvendit të Shqipërisë, 2009” shfuqizohet.

Neni 10

Ky udhëzim hyn në fuqi pas botimit në Fletoren Zyrtare.

KRYETARE
Lefterije Luzi